

Na osnovu čl. 4.2., 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu pravnog lica "Renewable Energy Solutions BH" d.o.o., Banja Luka, od 13. juna 2025. godine, na sjednici Državne regulatorne komisije za električnu energiju, održanoj 3. septembra 2025. godine, donijeta je

ODLUKA

O IZDAVANJU PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Pravnom licu "Renewable Energy Solutions BH" d.o.o., Banja Luka, izdaje se privremena licenca za obavljanje djelatnosti međunarodne trgovine električnom energijom.
2. Privremena licenca iz tačke 1. ove Odluke izdaje se za period od 16. septembra 2025. godine do 15. septembra 2027. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Privremena licenca za obavljanje djelatnosti međunarodne trgovine električnom energijom sastavni je dio ove Odluke.
4. Vlasnik privremene licence je u obavezi plaćati regulatornu naknadu u periodu važenja privremene licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH" i službenim glasilima entiteta.

Obrazloženje

Pravno lice "Renewable Energy Solutions BH" d.o.o., Banja Luka (u daljnjem tekstu: podnosilac zahtjeva), posjeduje privremenu licencu za obavljanje djelatnosti međunarodne trgovine električnom energijom, koja je upisana u Registar licenci Državne regulatorne komisije za električnu energiju (DERK) pod registracijskim brojem 05-28-12-254-21/23 od 13. septembra 2023. godine, a čije trajanje istječe 15. septembra 2025. godine.

Podnosilac zahtjeva je izrazio svoju namjeru da djelatnost međunarodne trgovine električnom energijom nastavi i dalje obavljati, ali ne u roku propisanom članom 48. Pravilnika o licencama – Prečišćeni tekst, budući da je zahtjev za obnovu licence, zaprimljen pod brojem 05-28-12-195-1/25, podnio tek 13. juna 2025. godine. O podnijetom zahtjevu odlučuje se u skladu s pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11).

Zahtjev je podniet na propisanim obrascima, s dokazom o prethodno izvršenoj uplati naknade za rješavanje zahtjeva i relevantnim dokumentima koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-195-3/25 od 16. jula 2025. godine.

Po pregledu i provjeri svih formalnih elemenata zahtjeva, DERK je 17. jula 2025. godine objavio u dnevnim novinama i na svojoj internet stranici kratku obavijest za javnost, sumirajući zahtjev za izdavanje licence i odredio rok do 25. jula 2025. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

U postupku odlučivanja po zahtjevu za obnovu licence, DERK procjenjuje i analizira ispunjavanje kriterija, uvjeta i standarda propisanih zakonom i pravilima i propisima DERK-a u obavljanju međunarodne trgovine električnom energijom tokom prethodnog perioda korištenja licence. S tim u vezi, tokom 2025. godine, podnosilac zahtjeva nije potvrđivao svoje finansijske mogućnosti i pružao dokaze da, van svake sumnje, ima osigurane finansijske resurse i profesionalne standarde da nastavi obavljati istu djelatnost, budući da je značajno kasnio s uplatom regulatorne naknade za prva tri kvartala ove godine.

Nadzor finansijskih aspekata usklađenosti dosadašnjeg djelovanja podnosioca zahtjeva s uvjetima i kriterijima za obavljanje djelatnosti međunarodne trgovine električnom energijom, dao je osnova DERK-u da ponovo pristupi izdavanju privremene licence, odnosno pripremi Nacrt odluke o izdavanju privremene licence za djelatnost međunarodne trgovine, koja bi, takođe, važila dvije godine i koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 7. augusta 2025. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi zakazanoj za 13. augusta 2025. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako je na općoj javnoj raspravi, a u skladu s članom 16. stav 2. Pravilnika o licencama – Prečišćeni tekst, punomoćnik podnosioca zahtjeva dao izjavu da se, u cilju ekonomičnosti postupka, odriče prava na dostavljanje komentara na Prijedlog odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

Na osnovu svega naprijed navedenog, te respektirajući i činjenicu da je podnosiocu zahtjeva izdata dozvola Regulatorne komisije za energetiku Republike Srpske na period od tri godine, koja važi do 28. juna 2026. godine, DERK je odlučio kao u dispozitivu ove Odluke.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-195-17/25

3. septembra 2025. godine

Tuzla

Predsjedavajući Komisije

Suad Zeljković